

LA CARTA DE SANTIAGO

Mbia icúe cúe jenda je Santiago ucheẽ mbesa mondo

1 ¹ Santiago chõ se re. Dios rimba chõ se re. Jesucristo rimba abe chõ se re. Judíos Jesús quiato je chõ aico nguiã ã mbesa mbesa. Judíos isúe cúe jenda je. Saludar ae chõ nguiã ã mbesa jêje.

Dios mii ño aba mbaaquiatu nguiã

²Mbae icuã tâ i mose jêje, jêya bei chõ nguia, Seresenda. ³—Ma Dios icua tuchite, i mose mbae mo tâ i jêje, jêingo tuchi chõ nguia Dios rese ùquĩ mose. Jeñimbirãcuã aqiuatu sacuã. ⁴Jeñimbirãcuã mbei chõ nguia Dios icua. Ñnda Dios riqui jembitorõ tirõ mbei jembuchũcuabo mingo. Ùquĩ mose ra jêturã tuchi cote.

⁵Jêingo turã aqiuatuã mose, jeñee ño Dios je. Jeñimbirãcuã aqiuatuã mose, jeñee ño Dios je no. Ae ra jembaaquiatu. Ae ñee nguia Dios je nae, ùquĩ ja je ra mbae mondo tuchi. Ñee asi asi eã nda ee no. ⁶Jê ache i mose Dios je, “Dios quia ñene”, jenyê tuchi quiatu quia. —Dios ra emee âte rei seje, i mose jemo, eicuâte ùquĩ. Ama ndebera rã ño ùquĩ nde. Sã quiririã ndiqui ama ndebera rerao turã eã no. Sã eriqui embuchebi chebite no. ⁷Ama ndebera rã emo siqui mose, Dios ra mbae mee eã ùquĩ je. ⁸Emo ndua ata ata mose, mbae mii mo ndese eriqui aroneate.

⁹Jesús quiato mo embae eã mose, sã eya tuchi chõ siqui. Sequiatote ite quia Dios nguiã ee aque. ¹⁰Sã Jesús quiato mbaecha ia bei chõ siqui, mbae icuã tâ i mose ee. Sã eya riquiã umbae tubiriã ndese. Sã Dios rese quiatu eya riqui. Embae ua mose, sã eya riqui ùquĩ mose abe no. Mbaecha mbae ra siqui bei eã. Sã quiata uti riqui soõ jeite no. ¹¹Tenda rasi mose ee, quiata ra ñimama. Euti abe ra uqui. Etura eã mbei ra cote. Eĩ si ra mbaecha. Umbae tubiriã nyabe chõ nda mano.

Mbae icuã tâ i mose nande je

¹²—Ã esaã icuã, i mose emo jêje, ijêsaãchĩ nda jê! Jêingo mingue chõ nguia ñimbirãcuã. Jeñimbirãcuã mose ra Dios mbae turã mee jêje.

Jemingo bei rae. —Ae nyesequa quia serese nae, ũquĩ nda amingo bei, i que Dios cose ra. ¹³—Ã esaã icuã, i mose emo jêje, Dios eã ño ñee nguiã jêje ũquĩ. —Dios que “ã esaã icuã” i seje ra, jenyechĩ nda jê. —Ã esaã icuã, i eã nda Dios emo je. Dios abe ra mbae icuã saã eã emo ñee mose ee. ¹⁴Aba chiangui renda icuã nguiarei mbae icuã osei uquia aba je. Dios eã ñene. ¹⁵Emo mbae icuã osei mose, mbae icuã naa arondete cote. Mbae icuã naa naa mbei mose ra Dios embasi cote.

¹⁶—Mbae icuã esaã, i mose emo jêje, Dios ñee eã nguiã jêje. —Dios chõ ñee nguiã, jenyechĩ nda jê. ¹⁷Ae mbae turã tuutu beite quia nande je nae, Dios chimondo chõ ũquĩ nde. Dios quiarei eturã mbei tuchi. Eicuã jiri jiriã emo mose. Sã Dios tenda ao no. Nyasi abe no. Ũquĩ nguiã nyiabi abi jiri nguiã. Dios quiarei nyiabiã mbei emo mose. Eturã mbei tuchi eriqui co. ¹⁸Sã Dios riqui seriirĩ i nande je no. Nande echeẽ icua mose nandechiangui re. —Jê nane je aico seriirĩ i co, i que Dios nane je ra. Dios riirĩ tubiriã tuchi ra ngaẽ nanderui cote.

Dios cheẽ jemumbayã ño nguiã eandu mose

¹⁹Dios quiarei eturã tuchi. Nyebe echeẽ jeñanduse tuchi quiatu quia jê. Jendua quiatu quia ñee nonde. Paama jenyê jei jei techĩ nguiã emo je. ²⁰Ae Dios bite riqui mbae nae, ũquĩ nandesaã aroneate nande paama i mose. ²¹Ae Dios ucheẽ mondo quia jeñiangui re nae, ũquĩ jêisi tuchi quiatu quia. Jêingo mingue chõ nguiã Dios cheẽ je jê. Aba mingo beisa chõ Dios cheẽ nde. Ae mbae icuã ndese mbia riqui nae, ũquĩ icuã tubiriãte eriqui raque. Ũquĩ si jêhui tuchi. Mbae icuã ja si jêhui tuchi.

²²Dios cheẽ nda jeñandu chooño chĩ jê. Echeẽ jemumbayã tuchi quiatu jê. Emo Dios cheẽ andu chooño mose, ae sí chõ ñimbiriĩ irĩ nguiã aque. ²³⁻²⁴Sã emo ndiqui mae ñooño nguba rese espejo je no. Sã eriqui tesarei jei chõ nguba si no. Eĩ si chõ Dios cheẽ andu chooño re. Tesarei jei chõ nguiã Dios cheẽ si. Echeẽ mumbayã ndocoĩ. ²⁵Dios cheẽ nguiarei aba mbui tuchi mbae icuã si. Ae siqui tuchi te quia Dios cheẽ ndese nae, ũquĩ ndese ra Dios riqui tuchi echeẽ mumbayã mose. Ũquĩ Dios cheẽ ñandu chooñoate quiatu nguiã. Echeẽ emumbayãte quiatu nguiã.

²⁶—Dios quiato chõ se re, i raque emo. Uchuru rerequia chooñoa mose, Dios quiato raã ñooño ño ũquĩ nde. Ae sí chõ ñimbiriĩ irĩ nguiã ũquĩ. ²⁷Ae Dios quiato chooñoa tuchi nae, ũquĩ ndiqui mbae turã naa naa ũquĩ. Ũquĩ ndiqui esi cheecha reaquiature ũquĩ. Ũquĩ ndiqui eru cheecha reaquiature ũquĩ no. Mbae eã mose eru cheecha mbae. Ũquĩ ndiqui ñimbiiacuã icuã eãte mbae icuã mo je ũquĩ.

Mbia nandesi turã ja chõ nguiã nyiabiã

2 ¹Jesucristo quiato chõ jê nde. Jenderequa tuchi chõ ae re. Nyebe mbia jêisi turã ja chõ nguiã nyiabiã. ²Sã mbaecha mo ndiqui ngasẽ

jeñimunua mose jėje no. Huiirao turã ndesebe. Eo cuasa turã ndesebe oro. Sã mbaecha reã mo abe riqui ngasẽ jeñimunua mose no. ³Sã jëingo mbaecha isi turã no. Sã jëingo embucoi erenda turã tose no. Sã jëingo mbaecha reã mbucoi turã eã no. ⁴Eĩ jenye mose, jëisi turã ja eã ño nguiã ũquĩ. Jembuchiabi chõ nguiã ũquĩ. Hue rĩ ja eã ño jëingo nguiã mbia cuata mee ũquĩ. Jendua turã eã ñochĩ nguiã ũquĩ. ⁵Secheẽ jeñandu rã, Seresenda. Mbia mbaecha reã ngue Dios irabo ra. Dios icua tuchi sacua. Ũquĩ ndese quiarei Dios o tuchi mbaecha mo si. —Ũquĩ nda siqui tuchi serese se ererecua tuchi mose, i que Dios ñee nyii ra. ⁶Jẽ ngue mbia mbaecha reã jenguirirõ tuchi ra. Eicuã eãte ũquĩ ndiqui raque jėje. Mbaecha quiatu eicuãte riqui nguiã jėje. Jembĩrĩ irĩ ño nguiã. Jenderao rao chõ nguiã ererecua je, jẽ mbae mo mee mee sacua ee. ⁷Mbaecha chõ ñee icuã icuã nguiã Cristo riĩ. Nandererecua chõ Cristo resẽ.

⁸—Sã ereico nyesequa ndechiese no. Eĩ ere si chõ nyesequa emo ndese, i que Dios mbia je cose ra. Dios cheẽ i tuchi chõ ũquĩ nde. Nande ũquĩ ñee mumbayã mose, nandeico turã ndae. ⁹Nande mbia mo isi turã mose, emo isi icuã mose, eicuãte ũquĩ. Nande mbia isi chiabi abi mose, Dios cheẽ nandemumba chõ nguiã ũquĩ. ¹⁰Dios cheẽ tubiriãte raque nande je echeẽ mumbayã sacua. Nande echeẽ mi mo mumba mose, echeẽ ja mumba raanguia chõ ũquĩ nde. Echeẽ ataque mumbayã ndaque. ¹¹Dios cheẽ tubiriãte. —Jëingochĩ nda emo ninisi rese, i que ra. —Mbia mo nda jëiquiachĩ, i que ae si ñee nda. Nande emo iquia mose, echeẽ nandemumba chõ nguiã ũquĩ. Nandeicoã ndaque emo ninisi rese. ¹²Dios cheẽ ngue nandembui mbae icuã si cote ra. Nandechesequa sacua mbia rese. Nyebe nandeico turã mbei chõ nguia mbia je. Dios quiatu ra nandecuata mee tuchi emo mose cote. ¹³Ae eya eã eãte riqui emo ndese nae, ũquĩ ndese ra Dios ia eã eã nandecuata mee mose. Nandeya eã mose emo ndese, ũquĩ mose ra Dios nandembasiã.

Nande Dios icua mose, mbae turã abe nandesã ño nguia

¹⁴Sã emo ndiqui ñee no. —Dios aicuate quia co, i. Ũquĩ mbae turã naa eã mose, ũquĩ nda Dios sirõ eã mbae icuã si. Dios icua chooño ño ñene. ¹⁵Sã Jesús quiato mbaecha reã mo ndiqui ngasẽ jėje no. Sã eirao eã ndiqui no. Sã echiurã mo eã ndiqui no. ¹⁶Sã jemo ndiqui ñeeño ee no. —Nde ae chõ ndechiurã etea. Nde ae chõ ndeiraorã etea. Eso turã ño, i jemo ee. Mbae mo mee ndocoĩ ee. Jeñee iru chooño ño nguiã ee ũquĩ. ¹⁷Jëingo turã eã mose emo je, Dios jëicua chooño ño nguiã ũquĩ. Jẽ Dios jëicua mose, mbae turã jësaã jiri ae.

¹⁸Sã emo ndiqui ñee no. —Dios aicuate quia co, i. Sã emo ndiqui ñee no. —Mbae turã asaã saã nguia co. Dios aicua chooño eã nguia co, sã emo ndiqui i no. Jẽ Dios icua mose ¿mañi ae ra jëicua mbae turã naa naa eã mose re? Se quiatu mbae turã asaã saã nguiã co. Nyebe ra mbia “eriqui

Jesús icuate co”, i seriĩ. ¹⁹—Dios miĩ ño siqui nguiã co, jenyẽ chõ nguiã ùquĩ. Eturãte raque ùquĩ. Aba checuayã abe riqui ñee ndaque Dios miĩ miĩ co no. Siquichete esi ñee ndaque eriĩ. ²⁰¿Mbaerã jëaracuayã tuchi riqui re? Emo mbae turã naa naa eã mose, Dios icua chooño ño nguiã ùquĩ. ²¹Sã nandei Abraham no. —Nderiirĩ emee seje, i mose Dios, Abraham ngue echeẽ mumba eã nda. Nyebe Dios Abraham isi turã mbei nguiã. ²²Abraham ngue Dios icua chooño eã nda. Mbae turã ngue esaã saã mbei quia Dios icua mose ra. Dios cheẽ ngue emumba eã nda. Nyebe nandeico nguiã ñee. “Abraham Dios icuate”, i. ²³Sã embesa ji riqui ñee no:

Abraham ngue Dios icua ra.

Nyebe que Dios eisi turã mbei ra,

i que embesa ji ra. Ùquĩ ngue ique tuchi cote ra. Nyebe “Dios Quiato” i nguiã Abraham je. ²⁴Emo Dios icua chooño mose, Dios ra eisi turã eã. Emo Dios icua tuchi mose, sã mbae turã abe raã naa. —Dios icuasa, i nda mbia ee cote chã. ²⁵Sã Rahab cose no. Cuña icuã. Siqui ata ata bei mbia rese. Aque que Josué chimondo isi turã nda. Mbuchimi turã ngue mondo mbia icuã si ra. Nyebe Dios Rahab isi turã nguiã. ²⁶Sã nanderete no. Umi umi eã mose, “eraaque” i chõ mbia nguiã ùquĩ je. Ùquĩ na ño mbia mo ndiqui nguiã ã. Mbae turã naa eã. Nyebe nandeico nguiã “Dios icuayãte” i ee ã.

Cochee chõ nandechuru nandereco

3 ¹—Mbia mbaaquiato quiatu sacua se, ijenye jaaja techĩ nda equia jẽ! Emo emo miĩ ño. Mbia ra mae tuchi urerese. Urecuata ra emee tuchi. Mbia mbaaquiato quiatusate quia ure re. ²Dios cheẽ nandechabi chabi chõ nguiã nande ja ã. Emo uchuru rerequia turã mose, nguete ja abe rerequia turã ño nguiã ùquĩ. ³Sã nandeico freno miĩ ticuasú churu rese no. Nandechẽ mumbayã sacua ño ùquĩ nde. Sã freno ñetẽ je chõ nandeico ticuasú rete rurucuata nandenduasa quti no. Ticuasú rete cuasute raque. ⁴Sã lancha cuasute raque no. Sã quiririã quiracuãte riqui raque ee no. Ira ñetẽ je chõ echa riqui nguiã embucuata turã unduasa quti. ⁵Eĩ ño nandechuru nguiã. Nandechuru mbae saã ata ata chõ nguiã. Eñetẽte raque. Sã tata ñetẽte raque no. Mbae ra esei ja tuchi oso quia.

⁶Tata rá ño nandechuru re. Nandechuru quiarei mbae icuã ñnumbarã raã uquia tuchi nande je. Nandechuru icuã na eãte nanderete resenda mo. Nandechuru chõ nanderete mbiicuã ja nguiã. Nandechuru chõ nandereco rerequia icuã mbei nguiã. Aba checuayã ño nandechuru rerequia icuã nguiã no. ⁷Sã nandeico quiaa riinda mo mbuseteã arõte raque no. Ae mbebe quia nae, ùquĩ abe nande mbuseteã arõte raque. Mbei abe nandembuseteã arõte raque. Ae siqui ama ñi nae, ùquĩ abe nandembuseteã arõte raque no. Ùquĩ ja que mbia mbuseteã emo mose ra. ⁸Nandechuru quiatu nandembuseteã aroneate nguiã. Nandechuru icuã nguiatu nandembuquiriri aroneate nguiã.

Mbei tasi je rã tuchi chõ nandechuru riqui nguiã nande je ã. ⁹Nandechuru je nandeico ñee turã ndaque nanderu Dios je. Nandechuru sí je chõ nandeico nguiã ñee icuã mbia Dios chiao je cote. Ae rã sí raque Dios mbia ao. ¹⁰Nandechuru sí je nandeico ñee turã ndaque. Ñee icuã abe no. Ûquĩ Dios biãte, Seresenda. ¹¹Sã icua riqui no. I turã mose, eturã ja bei chõ ñene. I reẽ mose, ereẽ ja bei chõ eno nde. I chumumbara chĩ aroneate icua mi ye. ¹²Sã isio riqui ia eã ira a mo no. Isio a bei chõ nda ia nguiã. Ira mo nda ia eã enongue a no. Ea sí chõ nda ia nguiã no. Sã nandeico i turã ndea eã i reẽ mbirõ no. Hue icua mi ye ra eñi ja eã. Eĩ si chõ nandechuru no nde. Nandechẽ ñumumbara mose, eicuãte ùquĩ.

Ae je Dios uaquiato mee nae

¹³Jemo aquiato mose, sã eriqui mbae turã naa naa mbei. Sã eriqui tochi bei no. ¹⁴—Paama jenyete checuayã mose jenyue, jëaquiato jësaã ñooño ño nguiã ùquĩ no. Jeñee ñooño ño nguiã ùquĩ. Dios cheẽ ndui eã tuchi chõ ùquĩ nde. ¹⁵Eĩ jenyete eã nda cote, Dios uaquiato mee mose jëje. Paama jenyete checuayã mose jenyue, Dios rã eã ño jë nde. Dios quiatoã nyisaã na ño ùquĩ nde. Aba checuayã nyisaã na ño ùquĩ no nde. ¹⁶Mbia ndua eã mose emo ndese, eicuãte ùquĩ. Mbia paama i checuayã mose nyue, eicuãte ùquĩ no. Ûquĩ mose ra mbia siqui turãya nyue. Mbae icuã icuã mbei ra ee. ¹⁷Dios uaquiato mee mose nande je, nandechiã turãte ra cote. Nandechiã nda ngoite cote. Cocheete ra nandeico cote. Emo ñee nda nandemumba eãte cote. Nandeya eã nda mbia rese cote. Mbae ra nandesã turã mbei quia cote. Nandendua ata ata eã nda cote. Nandechẽ nyecuate ra eriqui mbia je cote. ¹⁸Nande mbia nandemingo turã mose nyese, nandechiã turã nda nandeico cote.

Ae mbae icuã quiatote nae, Dios quiatoã ño ùquĩ nde

4 ¹¿Mbaerã ño jëingo nyao nyao nyiese chã? ¿Mbaerã ño jëingo ico icuã icuãte nyue chã? Jeñiangui renda icuã ni ño ñene. “Se chõ jë”, jenyete jaaja quiato nguiã mbae icuã osei osei. ²Jembae eã jenyesei choseichĩ nguiã ã. Jë ererequiayã mbei mose, mbia jëiquia arõ ñochĩ nguiã ã. Mbae jenyesei chosei chõchĩ nguiã ã. Nyebe jëicuã icuã mbeite riqui nguiã jenyue ã. “Embu seje”, jenyete ãte quiato nguiã Dios je. Nyebe jëingo nguiã eisiã. ³“Embu seje”, jenyete mose Dios je, “embu seje” jenyete icuã icuã ño nguiã ee ã. Mbae mumba chooño sacua ño jëingo nguiã “embu seje” i Dios je ã. Nyebe Dios riqui nguiã emee eã jëje. ⁴Sã cuña mo ndiqui hui ngu si no. Eĩ jenyete si chõchĩ nguiã hui hui Dios si ã. Ae Dios biãte nae, jë ùquĩ osei osei mose, Dios quiato aronea ño jë cote re. ¿Mañi jenyete quia ùquĩ icuayãte re? ⁵Sã embesa ji riqui ñee ñooño ãte no:

Espíritu Turã Dios mee nguia nandechiangui re nae, aque riqui ngueteãte nanderese co.

Nandeico sacuã Dios miñ ndese, i que embesa ji ra. ⁶Dios turã i ite riqui nande je co. Sã embesa ji riqui ñee no: Ae ucuasu saã saã nguia nae, Dios riqui ũquĩ ndiquisãte co. Ae siqui tochte quia nae, ũquĩ je quiatu Dios turã i ite riqui nguia co, i que embesa ji ra. ⁷Jẽingo tochi chõ nguia Dios je. Aba checuayã jẽsiquisã ño nguia jenyese. Ũquĩ mose ra uchã jẽsi cote. ⁸Dios jẽsiichã tuchi quiatu quia. Ũquĩ mose ra Dios abe jendiichã tuchi. Jẽingo mose mbae icuã ndese, jẽhui chõ esi. Jendua ata ata mose, jeñia jembitirõ ño. ⁹¿Mbaerã jẽingo iquia iquia mbae icuã naa mose re? ¿Mbaerã jẽyate riqui mbae icuã naa mose re no? Jenyeseo quiatu quia jẽicuã niñ. Jẽya eã nguiatu quia jẽicuã ndese no ae. ¹⁰Jẽingo tochi chõ nguia Cristo je. Aqere quia ra ae jẽturã mbuchecua mbia je cote.

Nandechẽ icuã eã emo niñ

¹¹Jeñee icuãchĩ nda emo niñ, Seresenda. Dios cheẽ mumba chõ ũquĩ nde. —Jenyeseo chõ nguia jenyese, i que Dios ra. Jẽ Dios cheẽ mumba mose, “Dios cheẽ icuã” i raanguia chõ ũquĩ nde. “Dios cheẽ icuã” jenyechĩ nda echeẽ mumbayã ndocoĩ jẽ. ¹²Dios ae chõ mbia cuata mee nguia co. Dios miñ ño ucheẽ mondo nguia nande je. Nande echeẽ mumbayã sacuã. Dios ae chõ aba rirõ nguia aba icuã si. Dios ae chõ nda aba mondo tata cuásuu no. Nande quiarei emo cuata nandemee aroneate.

Mbae mo tasaã isamami, nande aroneate

¹³Sã nandemo ndiqui ñee no. —Taso mbae mo naa naa pee. Taico are tuchi pee. Mbae mo isi sacuã icua. Tenda nongue mose ra achube, i no. Ndua rane eã Dios rese. ¹⁴Ũquĩ Dios biãte. Nandeiranuate mbae mo ndese. Mbae mo tu arondete tã i nande je. Isamami nandemano arondete. Shimbo rã ño nande re. Sã shimbo riqui quiachã jeite no. ¹⁵—Mbae mo tasaã, nandechĩ nda nande ae ndua mose rocoĩ Dios rese jẽ. —Dios eno i mose seje, ũquĩ mose quiatu mbae tasaã, nande quiatu quia. ¹⁶¿Mbaerã jẽingo tesarei Dios si re? ¿Mbaerã jẽingo “se ae mbae tasaã” i re? Jenguasu jẽsaã saã ño nguia ũquĩ. Eicuãte ũquĩ. ¹⁷Ae mbae turã icuate quia nae, sã ũquĩ ndiqui mbae turã naa mbei. Mbae turã naa eã mose, eicuãte ũquĩ cote. Dios biãte ũquĩ cote.

Santiago ñee asi mbaecha je

5 ¹Tacheẽ mbaecha je cote. Jẽya eã ndasi ra jẽsaã tuchi cote, mbaecha. Jenyeseo tuchi quiatu quia. ²Jembae ra ua ja tuchi cote. Chicuaquiariñ nda jẽirao ua tuchi. ³Jembae mbae isiquia ra quiachã ja cote. Jembae mbae isiquia rã nda jẽ abe jẽquiachã tuchi cote. Mbae isiquia rese chõ jẽingo nguia ndua. Dios rese ndua rocoĩ. Mbae isiquia jemunua nua tuchi chõ nguia Dios jembasi sacuã ã cote. ⁴Mbia que

quiei quiei rei quia jėje resē. Mbae que jemondo turā turāyā nguia jembae ishao shaosa je resē. Ūquĩ Dios mbiirandu raanguia chō nguĩ jeniĩ. Nyebe ra Dios jembasi uquirācuā je. ⁵Sā ticuasú riqui quiaru bei ñimbuquira no. Eiquia nonde. Eĩ ño jē nde, mbaecha. Jembi rese chō ngue jēingo bei quia ra. Jēquiaru chooño mbei que equia ra. Siqui rocoĩ Dios rese. Nyebe ra Dios jembasi cote. ⁶Jē ngue mbia turā jembasi mbasi quia ra. Jē ngue mbia turā jēiquia iquia quia no nda. Mbae icuā mo esaã eãte raque jėje. Nyebe ra Dios paama i tuchi jėje, mbaecha.

Jesucristo jēsaarō arō mingue chō nguia

⁷Jesucristo ra tube íbii, Seresenda. Jēsaarō arō mingue chō nguia. Sā mbia riqui ama nyaaquí raarō arō mingue no. Mbae tiquia nonde no. Aquere ra eriqui minguebe umbae raarō arō no. Eucua ucua nonde. ⁸Eĩ jenyē chō nguia Jesucristo raarō arō mingue jē abe. Jeñimbirācuā ño nguia Jesucristo raarō arō. Achite eñi tu a cote. ⁹Jeñee icuā icuāchĩ nda jenyue, Seresenda. Ūquĩ mose ra Dios jembasi. Namo jiri ra Dios mbia icuā mbasi. ¹⁰Jeñimbirācuā mingue chō nguia. Sā Dios cheē mbuchecuasa mbia cose ndare no. Sā ñimbirācuā mingue mbia icuā mose ee no. ¹¹Ae ñimbirācuā mingue quia nae, ūquĩ je chō Dios turā ndiqui nguia. Sā Job cose no. Ñimbirācuā mingue tuchi que equia ra. Aquere que Dios turā tuchi riqui ee cote ra. Ūquĩ jēicuate quia ā. Eĩ si chō Dios turā tuchi nguia mbia je co.

¹²Ā abe jeñandu tuchi. Jeñee ñooñochĩ nda jē. Jurar jenyechĩ nda emo mose jē. Ibatenda riĩ. Ibi jenda mo niĩ abe no. Mbae ja mo niĩ nda jurar jenyē jirichĩ jē. Eno jenyē mose, ūquĩ miĩ mbei chō jeñee. Tei jenyē mose, ūquĩ miĩ mbei chō jeñee no. Eĩ jenyē mose ra Dios ñee asiã jėje.

¹³Jemo ia eã mose, sã ñee Dios je. Jemo ia mose, sã irasei rasei Dios je no. ¹⁴Jemo ndasi mose, sã “jenyu” i Jesús quiato rerecua je. Sã ūquĩ ñee Dios je erasi riĩ cote. Sã mbae quira mo quti erasi āquĩ ndese Jesús riĩ. ¹⁵—Jesús ra embucherō, i mose uchiangui re ñee mose Jesús je, mbucherō ndae. Erasi mbae icuā naa mose nyii, ūquĩ nda embutiã esi no. ¹⁶—Mbae icuā ngue asaã eã nda, jenyechĩ nda jē. —Mbae icuā ngue asaã nda, jenyē quiatu quia jenyue. Jeñee quiatu quia Dios je jenongue riĩ. Ūquĩ mose ra Dios jembucherō. Emo turā mo ñee tuchi mose Dios je, Dios ra mbae turā saã tuchi ee. ¹⁷Sā Elías no. Nande rá si chō ndaque Elías. Sã ñee tuchi Dios je ama mbuchaaquí eã nonde no. Nyaaquí eã mbei que cote ra. Tres años y medio chee que ra. ¹⁸Aquere que Elías ñee Dios je cote ra. Ama mbuchaaquí sacuã cote. Aque mose que nyaaquí cote ra. Mbae que suri ja cote ra. Mbae ia ja chee no.

¹⁹Emo icha mose Dios si, sã enongue embuchebibe mingo Dios rui sí. ²⁰Nde mbia mo mbui mose huĩcuã si, eresiquisã quisã ño nguia eso eã sacuã tata cuásuu ūquĩ. Dios ra eicuã mbutiã esi cote.